



# Ақмешіт

22 тамыз  
сейсенбі  
№66 (1973)  
2023 жыл

Газет  
1994 жылдың 15 сәуірінен  
бастап шығады

Қалалық қоғамдық-саяси әлеуметтік-  
ақпараттық тарихи-танымдық газет •  
E-mail: akmeshit.kz@mail.ru

## апталығы

# Оқу жылына дайынбыз ба?

Санаулы күндерден соң кезекті жаңа оқу жылы басталады. Жаңа оқу жылына мектептердің дайындығы қандай? Оқушылар мен ұстаздар керекті құралдар-жабдықтармен қамтылған ба? Осы және білім саласына қатысты басқа да өзекті мәселелер жайлы облыстық білім басқармасы басшысының міндетін атқарушы Бағдат Бердәулетов пен білім саласында сапаны қамтамасыз ету департаментінің басшысы Галия Даулетова бұқаралық ақпарат құралдарына баспасөз мәслихатын өткізді.



Бағдат Бердәулетовтің айтуынша, аймақта жаңа оқу жылында 180 мың оқушы білім алады деп жоспарлануда. Бүгінге дейін бірінші сыныпқа 17 543 бала қабылданған. Педагогтар саны – 23 086.

– Жаңа оқу жылы қарсаңында көмекке мұқтаж 37 087 баланы бір реттік қаржылай көмекпен қамтамасыз ету үшін жергілікті бюджеттен 1,3 млрд теңге бөлінді. «Мектепке жол» акциясы аясында демеушілер көмек беруде.

2 БЕТТЕ

## ЖЕМҚОРЛАР ҚАРЖЫСЫ ЖҰМСАЛАТЫН ЖЕР

Мемлекет басшысы Қасым-Жомарт Тоқаев өткен жылғы 1 қыркүйектегі жолдауында жемқорлардың қаржысы мектеп құрылысына жұмсалуда тиістігін айтқан болатын. Президент 2025 жылға дейін 800 мың баланың заманауи мектепте оқуына жағдай жасап, апатты жағдайдағы және үш ауысыммен оқитын мектеп мәселесін толық шешу керектігін атап өтті.

– Жалпы мектеп салу Үкімет және әкімдіктер үшін басты міндеттің бірі болуы керек. Жемқорлар сотталғанда, олардың заңсыз тапқан қаржысы мемлекетке өтіп, түгелдей мектеп құрылысына жұмсалуда тиіс. Үкімет осы бастаманы заң тұрғысынан рәсімдеу туралы шешім қабылдауы керек, – деді Қазақстан Президенті.

Негізгі заңсыз иеленген активтерді мемлекетке қайтару үдерісі басталғаннан кейін жемқорлардан қайтарылған қаражатты жинақтайтын арнайы қор құрылған болатын. Ескендір Зұлқарнайын Егемеп. kz-те жарық көрген «Қайтқан қаржының қайыры» атты материалында өткен жылдың желтоқсан айынан бері қорға 151,6 миллиард теңге түскені туралы дерек келтірілген.

Үкіметтің баспасөз қызметі берген мәліметке сүйенсек, бұл қаражат мектептер құрылысына жұмсалып жатыр. Яғни Президент тапсырмасы жүзеге асып жатыр деген сөз. Қолда бар деректерге қарағанда, Астана, Алматы, Шымкент қалаларында 76 мың орынға шақталған (екі ауысымдық) 62 мектеп құрылысы қаржыландырылған.

А.БЕК

Еліміздің қаржы министрлігі «2024-2026 жылдарға арналған республикалық бюджет туралы» заң жобасын ұсынды. Құжатта 2024 жылы орташа жалақы мен зейнетақы қанша болатыны көрсетілген. Бұйрық жобасы «Ашық НҚА» порталында жарияланған.

## 2024: орташа жалақы мөлшері ұсынылды

Бұл жобаға сәйкес, 2024 жылғы 1 қаңтардан бастап ең төменгі жалақы (МВт) – 70 000 теңге болса, айлық есептік көрсеткіш (АЕК) – 3692 теңгені құрамақ. Мемлекеттік базалық зейнетақы төлемінің ең төменгі мөлшері – 28 215 теңге болса, ең төменгі зейнетақы – 57 853 теңге көлемінде ұсынылып отыр. Базалық әлеуметтік төлемдердің мөлшерін есептеу үшін ең төменгі күнкөріс деңгейі – 43 407 теңге болмақ. Сондай-ақ жасы бойынша және еңбек өтілі бойынша зейнетақы төлемдерін 9%-ға арттыру көзделген.

МӘМС төлеуге жататын міндетті медициналық сақтандыруға мемлекет жарналарының мөлшері мемлекеттік жарналарды есептеу объектісінің 1,9%-ы болады.

Әскери қызметкерлерге (шұғыл әскери қызметкерлерді қоспағанда) және арнаулы мемлекеттік және құқық қорғау органдарының, мемлекеттік фельдъегерлік қызмет қызметкерлеріне тұрғын үйді ұстауға және коммуналдық төлемдерді төлеуге арналған ақшалай өтемақы мөлшері өзгермейді және 3 739 теңге болады.

Республикалық БАҚ-тарда жарияланған ақпаратқа сүйенсек, заң жобасы осы жылдың 4 қыркүйегіне дейін қоғамдық талқылауда болады.

А.АҚЫЛБЕК

## ЖҮЙРІКТЕР СЫҢҒА ТҮСКЕН СӘТ



3 БЕТТЕ

## ОЙЫНШЫҚТЫ ДА ОЙЛАНЫП АЛҢЫЗ



4 БЕТТЕ



## Білім сапасына көңіл тола ма?

«Жаз жайнатып, күн күлдірген» үш ай каникул да аяқталып, жаңа оқу жылына дайындық қыза түсуде. Бүгінде мектепке дайындалып, базар жағалаған, одан қалды мектеп таңдаған ата-ана аз емес. Жақында «Ranking.kz» сайты еліміздегі білім беру қызметінің сапасы қаншалықты екенін бағамдау үшін сауалнама жүргізіпті. Бір қуанарлығы, елдегі білім беру сапасына қанағаттанатындар саны арта түскен.

Мәселен, мектепке дейінгі білім беру 49,2%-дан 50,3%-ға, орта-арнайы білім беруде қызметтерінің сапасына қанағаттанғандардың үлесі бір жылда 2022 жылғы 48,4%-дан 2023 жылы 49,4%-ға, орта жалпы білім беруде – 43,7%-дан 46%-ға, жоғары және жоғары оқу орнынан кейінгі білімде – 42,1%-дан 44,9%-ға дейін өсті.

2 БЕТТЕ



THE WALL STREET JOURNAL.

## ҚЫТАЙДА ЖҰМЫССЫЗДЫҚ АРТҚАН

Экономикалық әлеуетін арттырған Қытайдың оққылығы жоқтай көрінетіні рас. Себебі, «аспанасты елінде» ғаламдық кәсіпорындардың басым бөлігі орналасқан, кәсіпке мүмкіндік мол, жұмыс күшіне сұраныс жетерлік. Дегенмен, саяси ахуал салдары осы мінсіз тізбекті сетінеткендей. Олай дейтінміз, соңғы уақытта Қытай жастарының жұмыссыздық көрсеткіші едәуір артқан. Тіпті ел үкіметі бұл бағыттағы статистиканы жариялауды да тоқтатты. Бұған қарап жағдай ушыға түскенін сезуге болады.



Иә, әлемдік БАҚ-тың өткен аптадағы басты тақырыбы Қытай жастарының жұмыссыздық деңгейіне арналды. Қолда бар дереккез бен ресми мекемелердің мәліметтері желіні шұлатқаны белгілі. Солардың ішінде «The Wall Street Journal» басылымының сенбілік санына ерекше тоқталу жөн секілді. Әсіресе, басылым тілшісі Джейсон Дуглас «Қытай деректерді жасыруда» деген атаумен мақала әзірледі. Онда жұмыссыздық туралы соңғы көрсеткіш, шенеуніктер пікірі қамтылған.

«Жуырда Қытайдың Ұлттық статистика бюросы жастар арасындағы жұмыссыздық деңгейі туралы ақпаратты жариялауды тоқтатынын мәлімдеді. Мұның алдында ғана аталған көрсеткіш рекордтық деңгейге жеткен болатын. Жастар арасындағы жұмыссыздық тоқтаусыз өсіп, 7 ай бойы ауыздықсыз келеді. Мәселен, биыл 16-24 жас аралығындағы қала жастарының жұмыссыздық деңгейі 21,3 процентке жетті. Соңғы 4 жыл ішінде жұмыссыздық деңгейі екі есеге жеткен болатын. Бұл – рекордтық көрсеткіш. Есте болса, қаңтар айында статистика 17,3 процент еді. Ал шілде айының көрсеткіші одан да жоғары болуы ықтимал. Дегенмен Үкімет тиісті есепті жариялаудан қашқақтауда», – дейді мақала авторы.

Автор құр болжам мен ел арасындағы деректі ғана келтіріп қоймай, бюро басшысы Фу Линхуэйдің пікірін де қосыпты. Онда жастардың жұмыссыздық деңгейі туралы жасыру экономикалық және қоғамдық өзгеріс үшін қажет деп көрсетілген. Саясаткерлердің пікірінше, бұл – кемшілікті жасыру жолы. Есте болса, бұған дейін пандемия кезінде ҚХР қаза болғандардың дерегін жасыратын. Әскери техника, технологиялық көрсеткіш те ара тұра күңгірт-тін. Алайда экономикалық, әлеуметтік көрсеткішті жасыру алғаш кездесуде. Бұл инвесторлардың экономика алпауытына деген сенім лимитіне әсер етуі мүмкін.

«Бұл бағытта түсініксіз әрекет көп. Мысалы, жақында Қытай Орталық банк екі проценттік ставканы түсірді. Бұған өткен айдағы тұтынушылар шығыны мен кәсіпкерлердің табысының азайғаны себеп болған. Өндіріс саласында да өнім деңгейі төмендеп, экономикалық қиындық сезіледі.

Жалпы ахуалдың бұлай құбылуы елдегі еңбекке жарамды азаматтардың санына, демографиялық дерекке байланысты секілді. Мәселен, Фу Линхуэйдің өзі ҚХР-да 16 мен 24 жас аралығындағы жастар саны 96 миллион деп айтқан. Олардың басым бөлігі студенттер екен. Бюро басшысының өз сөзіне салсақ, «студенттердің басты міндеті – оқу. Ал оларды жұмысқа қабілетті жастардың қатарына қосу керек пе, жоқ па, ол жағы әлі белгісіз». Оған қоса шенеуніктер жастардың жұмыссыздық мәселесін шешуге бағытталған жоба әзірлеуде. ҚХР экономикасының үздіксіз жұмыс істеуі үшін тиісті шара қолданылатынын жеткізді», – дейді Джейсон Дуглас.

4 БЕТТЕ





